

Django Simoons su bida tabata prensa

Aruba

Aruba a perde un di su icononan den prensa skirbi. Django a fayece na edad di 79 año. El tabata un persona cu a dedica su bida na prensa, trahando inicialmente como fotografo di prensa, pero despues a cuminsa skirbi tambe. El a traha den, entre otro, e corantnan La Prensa, Nobo y Diario. Django tabata den e programa Herencia net prome cu el a cumpli 70 año.

Corsou

Johnny Kenneth Simoons a nace na Corsou dia 3 di april 1946, for di ambos mayor Surnameño. Su tata a traha na Shell. Prome cu esey, su tata tabata capitan di un barco cu tabata trece inmigrante pa traha na Shell.

“Nos tabata un famia consistiendo di cuater yiu. Un di nan ta muhe, juffrouw di scol. Nos mayornan a lanta nos mustrando semper cu mester demostra respet na tur hende, specialmente hende grandi. Asina mi tambe a lanta mi yiunan,” Johnny a conta den e programa Herencia.

Johnny a bay Albertuscollege na Corsou. E tabata un bon alumno. Despues di scol, practicamente e no a traha na Corsou, pasobra el a conoce un mucha muhe cu kende el a casa. Riba mesun dia cu nan a casa na Corsou, Django a biaha pa Aruba hunto cu su esposa pa forma su famia. Mayornan di su casa ta di Aruba. Tres yiu homber a nace for di e famia aki.

Hubentud

Johnny Simoons tocante su hubentud na Corsou: *“Nos a lanta den un famia uni. Nos tabata tres yiu homber y un yiu muhe. Mi ruman muhe tabata maestra di scol. Mi rumannan homber tabata hopi musical, cu hasta nan mes banda musical hunto cu algun amigo, The Fox Stars. Regularmente nan tabata presenta, entre otro, riba dak di e tienda Herenmode Colon di Harry Beke. Mi mama tabata kier pa mi siña toca piano, pero mi no tabata gusta.”*

For di hoben mes, Johnny tabata gusta investiga. E kier a sa tur cos, loke a sigui despues. Como trahado den prensa, Johnny — of Django — a hasta sigui un curso por escrito tocante con haci investigacion cerca un inspector di polis bibando na Utrecht, Hulanda. Un inspector policial na Aruba, Tuinenburg, tabata controla su articulonan investigativo.

Aruba

Johnny su esposa a hiba e pa Aruba, cu a lo largo a bira su cas. Casi 60 año el a biba riba e isla aki, te na su morto siman pasa. *“Mi a gusta Aruba. For di e prome dia cu mi a establece riba e isla aki, mi a soru pa adapta mi mes. Mi a*



sigui lesnan cu mama a duna mi, kende semper tabata bisa cu si bo bay biba den un otro pais, bo mester soru pa adapta na ambiente, custumber y hendenan di e pais ey. Esaki mes mi a haci na Aruba y a keda ricibi y acepta cu brasa habri.”

Johnny a conta cu su sanger a bay bon cu e Rubiano: *“Hende di Aruba ta cariñoso, pero tambe nacionalista, patriota. Mi a adapta na nan sistema y cultura.”*

Despues cu el a yega Aruba, Johnny a haya trabou na Joyeria Ragunath, San Nicolas. El mes tabata biba na Playa.

Prensa

Johnny Simoons a bira un icono den prensa na Aruba. Su prome contacto cu prensa tabata via Broeder van Dongen cu tabata traha pa e corant Amigoe na Corsou. El a topa cu Van Dongen na Aruba durante un actividad cu el mester a cubri pa corant, pero e no por a keda tur e tempo. El a pidi Johnny pa tuma nota p’é pa dun’é despues.

Johnny: *“Chicho Jonckheer, doño di La Prensa, a bini for di Corsou pa haci e tramitenan pa habri un oficina di e corant aki na Aruba. A nombra Tom Pieters como representante di La Prensa. Tom a pidi mi pa bin traha na La Prensa como fotografo. Asina mi trabou den prensa a cuminsa na Aruba. Despues mi a cuminsa skirbi tambe pa corant.”*

Como fotografo di prensa, Johnny a haya e bijnaam ‘Django’. El a splica cu el a haya e fama di tabata presenta rapido na sitionan di accident di trafico of crimen. Hopi biaha el tabata presenta prome cu polis.

Tabatin un accident di trafico un biaha dilanti Holiday Inn, un hotel conoci na Aruba. Un homber a cay for di un baki di pickup. Djis despues Johnny a yega na e sitio pa saca

foto. Un hende para na e sitio a dun'é e bijnaam Django, referiendo na e personahe Django den pelicularan western. Django tabata hopi lihe cu su revolver.

NOBO

Na aña 1974, algun empresario di Corsou y Aruba a uni forsa pa lanta un corant nobo, cu a haya tambe e nomber NOBO. Carlos Daantje tabata hefe di redaccion di NOBO. Nan a acerca Johnny pa bira nan fotografo na Aruba. El a acepta y asina a bandona La Prensa.

Tabata na NOBO cu Johnny Simoons a bira 'grandi den prensa', specialmente pa su rapidez pa yega na sitionan di accident, crimen y otro suceso impactante na Aruba. Na momento cu specialmente den decadanan setenta, ochenta y nobenta tabata papia di prensa na Aruba, e nomber Django no por a keda fo. Tabata mencioná su nomber hunto cu, entre otro, Jos van der Schoot di Amigoe, Djispie Franken, Ramiro Tromp, Tom Pieters, Jossy Mansur, Toko Winklaar, Gerard Schouten y mas icono den prensa Rubiano.

Caso grandi

Django a cubri hopi caso grandi na Aruba. Asina e ta corda

con el a logra penetra den e edificionan di aeropuerto di Aruba tempo di e famoso secuestro di un avion di Aeropostal, cu a sali for di Caracas cu destinacion Corsou.

El a sconde den WC y a haya su mes despues den e sala di comando, for di unda autoridadnan Venezolano y di Aruba tabata dirigi e operacion pa atende cu e secuestro ora cu e avion a aterisa na Aruba.

Johnny: *"Durante mi carera den prensa hopi biaha mi a uza tacticanan no convencional pa yega na sitio di suceso. Hasta mi a yega di subi clandestino riba crashtender y den ambulance. Hopi cos mi a mira y saca foto. Accidentenan di trafico cruel, pero semper mi a bay tratando pa publica foto na un manera responsabel, consciente di con doloroso e fotonan aki por ta pa e famianan."*

Django cu su setenta aña, tempo cu el a aparece den e programa Herencia, ainda tabata trahando pa e corant DIARIO:

"Doñonan di DIARIO a bisa cu mi por keda traha te ora cu mi mes dicide di stop. Mi stima e trabou aki. Si mi muri i por nace bek, lo mi bolbe scoge pa e profesion aki."

